

पावलसे थेसलोनिकेला विश्वासीगदेदा भ्रिबा न्हीरेमला चिठी

चु चिठीला बारेरी पाङ्तोःमा

- **भ्रिबा म्हि:** येशूला मुल चेला पावलसे भ्रिबा मुबा। चु चिठी भ्रिबाला लागिरी पावलदा सिलासदेन तिमोथी भिबा म्हिसे हो लबा मुबा (२ थेसलोनिकी १:१)।
- **भ्रिबा ग्ला:** कोरिन्थ शहररी भ्रिबा मुबा।
- **भ्रिबा साल:** ओस्पन ईशवी संवत् ५१ (विक्रम संवत् १०८) सालरी भ्रिबा मुबा।
- **खाल्दा भ्रिबा:** थेसलोनिके शहररी मुबा विश्वासीगदेदा भ्रिबा मुबा।

थेसलोनिके शहरला मण्डली न्हडरी ख्रीष्ट दोःसी फेप्खला भिबाला बारेरी ल्हानान तामगदे तबा मुबा। चु तामला बारेरी ल्हानान ताम तबासे लमा थेसलोनिके शहरला विश्वासीगदेला गुडरी लुसीला तामगदे थोन्जी। थेनीगदे न्हडला कोइ कोइसे ख्रीष्ट फेप्खबा धुइ मी डाच्छान तसी जिन्बा मुला भिसी विश्वास लमुबा। थेनीगदेला चुहङ्बा विश्वास म्हाङ्सी पावलसे थेनीगदेदा घोना लबाला लागिरी चु न्हीरेमला चिठी भ्रिबा मुबा। चु चिठीरी पावलसे ख्रीष्ट फेप्खबा भन्दा डाच्छा ख्रीष्टला बिरोध लबा नइबा गे लबा म्हि खला, ओच्छे थेसे जम्मान नइबा तामगदे लबान निला भिसी भ्रिबा मुला।

पावलसे चु चिठी पढब लबागदेदा जस्तोन दुख तसैनोन हाङसे लबा विश्वास आखलाना कोङ्सी चिउ। ओच्छे पावलसे हाङदेन हाङला होगदेसे हङ् लसी सदन ज्यबा गे लतोःला भिसी थेनीगदेदा पाङ्बा मुला।

मुल तामगदे

- फ्याफुल्बा १:१-२
- स्याबासदेन आँट पिन्बा १:३-१२
- ख्रीष्ट दोःसी फेप्खबाला बारेरी घोना लबा २:१-१७
- ख्रीष्टदा विश्वास लबागदेला बानीबेहोर ३:१-१५
- चिठीला थुमरी भ्रिबा ताम ३:१६-१८

पावलसे थेसलोनिकेला विश्वासीगदेदा भिबा न्हीरेमला चिठी

१ लास्सो यहाङला परमेश्वर आबादेन प्रभु येशू ख्रीष्टदा विश्वास लबा थेसलोनिकेरी मुबा जम्मान विश्वासीगदेदा डा पावलदेन सिलास ओच्छे तिमोथीला फ्याफुल्ला!* २परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

धन्यवाददेन प्रार्थना

३आलेगदे, एनीगदेला लागिरी परमेश्वरदा डन्से सदन धन्यवाद पिन्तो:बा मुला। तिग्दा भिसम एनीगदेला विश्वास ल्हानान बढब तबा मुला, ओच्छे हाङ हाङ न्हङरी एनीगदेला माया बढब तबा मुला। ४ओच्छे एनीगदे जम्मान दुख कष्ट नासी विश्वासरी याङयोङ आतना चिबा मुला। थेतबासेलमा एनीगदेला

चुहङ्बा विश्वासला बारेरी डन्से परमेश्वरला अर्गु मण्डलीगदेला गुडरीनोन ताङ्सी ताङ्सी पाङ्म्याङ्बा मुला। ५एनीगदेसे दुख नाबासे लमा एनीगदे परमेश्वरला यहुल्साला म्हि दोबा मुला। चु जम्मान तामग्याम परमेश्वरसे खालैला ली आच्याना ठीक निसाफ लबा मुला भिबा ताम था याङ्बा मुला। ६एनीगदेदा दुख पिन्बादा परमेश्वरसेन दुख पिन्ना, तिग्दा भिसम परमेश्वर खालैला ली आच्याना ठीक निसाफ लबा परमेश्वर हिन्ना। ७प्रभु येशू ख्रीष्ट शक्तिशाली स्वर्गदूतगदेदेन मेला ल्हामरी स्वर्गग्याम फेप्खला। ओच्छे दुख नाबा डन्देन एनीगदेदा थे धुङरीन परमेश्वरसे यहाङदा चु दुखग्याम फेला। ८तर परमेश्वरदा डोआसेबागदेदेन यहाङला प्रभु येशूला थार्बा पिन्बा समाचार

आड्यान्बागदेदा परमेश्वरसे सजाय पिन्ना। ^६थेनीगदे प्रभुदेन प्रभुला घेन यहालदेन शक्तिग्याम फेसी चितोःला। ओच्छे थेनीगदेसे सदनना लागिरी नाश तबा सजाय याङ्ला। * ^{१०}चु ताम चा प्रभु येशू फेप्खबा धुइरी तला। थे धुइरी परमेश्वरला जम्मान विश्वास लबा म्हिगदेसे प्रभु येशूदा ल्हानान जयजयकार लला। जमा धुइरी एनीगदेएनोन थेनीगदेदेन छ्यामनोन तला, तिग्दा भिसम डन्से पाङ्बा तामरी एनीगदेसे विश्वास लजी।

^{११}थेतबासेलमा यहाडला परमेश्वरसे एनीगदेदा ड्योइबा अन्छार ज्यना लसी भ्रखमौ, ओच्छे एनीगदेसे लबारी म्हाइबा ज्यबा गेदेन एनीगदेला विश्वासग्याम लबा गे थेला शक्तिग्याम पूरा लगै भिसी डन्से प्रार्थना लबा मुला। ^{१२}थेहङ् लजी भिसम एनीगदेग्याम प्रभु येशूला मान तला ओच्छे प्रभु येशूएनोन एनीगदे म्हाइसी ताङ्ला। तिग्दा भिसम एनीगदेसे यहाडला परमेश्वर आबादेन प्रभु येशू ख्रीष्टग्याम दयामाया याङ्बा मुला।

परमेश्वरला बचन आड्यान्बा म्हि

२ ज्योज्यो आले नाना आडागदे, यहाडला प्रभु येशू ख्रीष्ट दोःसी फेप्खबा धुइरी यहाड थेदेन छ्यामनोन हुप तला भिबा तामला बारेरी डन्से एनीगदेदा पाङ्बा मुला। * ^२खालैसे

एनीगदेदा प्रभु फेप्खबा धुइ तसी जिन्बा मुला भिसी पाङ्जी भिसम थेहङ्बा ताम डनीग्याम खबा ताम हिन्ना भिसी एनीगदे थालोङ्गो। तिग्दा भिसम थेहङ्बा म्हिगदेसे डन्ना मिन किन्सी तामग्याम, चिठीग्याम ओच्छे परमेश्वरला आत्माग्याम पाङ्बा हिन्ना भिसी एनीगदेदा फसब लबारी म्हाइमुला। तर एनीगदेसे थेनीगदेला ताम विश्वास थालउ भिबा डन्ना बिन्ती मुला। ^३ओच्छे एनीगदेदा खालैसेन तिगै ताम लसी फसब थालगै। तिग्दा भिसम पाप गे लबादेन नाश ततोःबा म्हि खसी परमेश्वरदा ल्हानान बिरोध आलतेधोना प्रभु फेप्खबा धुइ आख। ^४थे म्हिसे हाडसे हाडदान घेन स्होसी म्हिगदेसे परमेश्वर भिसी तेन्बा जम्मान स्हेला बिरोध लला। ओच्छे डानोन परमेश्वर हिन्ना भिसी थे परमेश्वरला मन्दिररी चिला। *

^५डा एनीगदेदेन छ्याम मुबा धुइरी डाइ पाङ्बा ताम एनीगदेसे ढन्बा आरे? ^६थे म्हि थेला धुइ आतमान थोन्ना भिसी परमेश्वरसे दान्देधोना थेदा रोकब लसी थान्बा मुला भिबा ताम एनीगदेदा थानोन मुला। ^७तिग्दा भिसम थे परमेश्वरला बचन आड्यान्बा म्हिसे न्हड न्हडनोन गे लसी जिन्बा मुला। तर थेदा रोकब लसी थान्बा शक्तिसे थेदा आखलातेधोना

थेसे लबा नइबा गेगदे म्राड्आखम।
 ८थे परमेश्वरला बचन आड्यान्बा म्हि
 थोन्ना। जमाहेन्से प्रभु येशू घेन शक्तिरी
 फेप्खसी थेदा फू लसीन नाश लला।*

९परमेश्वरला बचन आड्यान्बा
 थे म्हि शैतानना शक्ति थोसी खला।
 ओच्छे थेसे ल्हानान थरीला फट्टा
 चिनुगदेदेन उदेकला गेगदे लला।*
 १०ओच्छे नाश तबागदेदा थेसे नइबा
 गे लसी फसब लला। तिग्दा भिसम
 थेनीगदेदा थार्बा पिन्बा सत्य ताम सेम
 आनिनी। ११थेतबासेलमा थेनीगदेसे
 लुसीला तामरीन विश्वास लगै भिसी
 परमेश्वरसे थेनीगदेदा अलमल तबा
 शक्ति गिक थेनीगदे मुबा ग्लारी
 पुइखला। १२तिग्दा भिसम थेनीगदेसे
 सत्य तामरी विश्वास आलना नइबा
 तामनोन ज्यबा भिसी म्हन्बासे लमा
 परमेश्वरसे थेनीगदेथोरी निसाफ लबा
 हिन्ना।

थार्बा याड्बाला लागिरी धम्बागदे

१३प्रभुसे माया लबा आलेगदे,
 एनीगदेला लागिरी डन्से सदन
 परमेश्वरदा धन्यवाद पिन्नोन तोःबा
 मुला। तिग्दा भिसम एनीगदेदा तिगै
 दोष आरेबा म्हि स्होबारी परमेश्वरला
 आत्मादेन एनीगदेसे विश्वास लबा
 सत्य तामग्याम थार्बा याड्गै भिसी
 परमेश्वरसे एनीगदेदा डाच्छाहेन्सेन
 धम्बा हिन्ना। १४डन्से एनीगदेदा

थेःना लबा थार्बा पिन्बा समाचारग्याम
 य्हालदेन शक्ति पिन्बारी य्हाडला
 परमेश्वरसे एनीगदेदा ड्योइबा हिन्ना।
 थेतबासेलमा परमेश्वर प्रभु येशू
 ख्रीष्टदेन छ्याम ताड्बा हड् एनीगदेदेन
 छ्यामएनोन ताड्ला। १५थेतबासेलमा
 ज्योज्यो आले नाना आडागदे, डन्से
 डाच्छा लोप्बा तामग्याम तसै डन्से
 भिबा चिठीग्याम तसै एनीगदेसे डन्से
 लोप्बा ताम ड्यान्सी कोड्सी चिउ।

१६य्हाडदा माया लबा प्रभु
 येशू ख्रीष्टदेन परमेश्वर आबासे
 थेला दयामायाग्याम य्हाडदा
 जुकजुकधोनाला आँटदेन ज्यबा
 आश पिन्बा मुला। १७थेतबासेलमा
 परमेश्वरसेन अभ्र सेमरी आँट पिन्सी
 एनीगदेदा जम्मान ज्यबा गेदेन ज्यबा
 ताम लबारी सदन भड पिन्नौ।

प्रार्थना

३ ज्योज्यो आले नाना आडागदे,
 डन्ना लागिरी प्रार्थना लसी
 पिन्गो, तिग्दा भिसम एनीगदेसे
 थेःबा हड् प्रभुला बचन अर्गु जम्मान
 ग्लाला म्हिगदेसे योनान थेःगै। ओच्छे
 थेनीगदेसेनोन एनीगदेसे हड् नोन
 प्रभुला बचनदा मान लगै। २ओच्छे
 परमेश्वरसे डन्दा आज्यबा म्हिदेन
 पापी म्हिगदेग्यामसेनोन जोगब लसी
 पिन्नौ भिसी प्रार्थना लसी पिन्गो। तिग्दा
 भिसम जम्मान म्हिगदेसे मी विश्वास

आल। ३तर प्रभु मी विश्वास लखम्बा प्रभु हिन्ना। थेसे एनीगदेदा विश्वासरी कोङ्ना लला ओच्छे शैतानग्याम जोगब लसी थान्ना। ४डन्से कुल्बा ताम अन्छारनोन एनीगदेसे गे लबान मुला। ओच्छे थेहङ् लसीन सदन गे लला भिबा ताम डन्से प्रभुग्यामनोन था याङ्बा मुला। ५परमेश्वरसे एनीगदेदा लबा मायादेन ख्रीष्टसे नाबा दुख एनीगदेसेनोन लबारीदेन नाबारी खमौ भिसी प्रभुसेन उन्नै।

ब्लेगुगदेदा पाङ्बा ताम

६ज्योज्यो आले नाना आडागदे, यहाङला प्रभु येशू ख्रीष्टला अधिकारग्याम डन्से एनीगदेदा चु ताम कुल्ला। डन्से लोप्बा ताम अन्छार आभ्रबादेन ब्लेगु विश्वासीगदेग्याम थारेड तसी चिउ। ७तिग्दा भिसम डन्से लबा हङ्गनोन लतोःला भिबा ताम एनीगदेदा थानोन मुला। एनीगदेदेन छ्याम मुबा धुइरी डनी खाइमै ब्लेगु दोसी आचिनी। ८डन्से टाङगा आफाना खालैला तिगै आचनी, बरु एनीगदेदा दुख थातगै भिसी डन्से धिन म्हुननोन दुख लसी गे लजी। ९एनीगदेग्याम डन्से टाङगा किन्बा अधिकार आरे भिसी आहिन, तर एनीगदेसेनोन डन्से हङ्गनोन लगै भिसी डन्से चुहङ् लबा हिन्ना। १०एनीगदेदेन छ्याम मुबा धुइरी डन्से एनीगदेदा “खालैसे गे आलनी भिसम थेसे चबा थुङ्बा

थालगै” भिसी पाङ्मुबा। ११तिग्दा भिसम एनीगदे न्हङरी कोइ कोइ म्हिसे ब्लेगु दोसी तिगै गे आलना म्हिसे लबा गेरी ओहङ्गनोन या भाङ्मुला भिबा ताम डन्से थेःमुला। १२थेतबासेलमा थेहङ्बा म्हिगदेदा प्रभु येशू ख्रीष्टला अधिकारग्याम डाइ चुहङ् लसी कुल्ला। थेनीगदे कुटिसी हाड हाङला गे लगै ओच्छे हाङ हाङलान यासे स्होसी चउ। १३तर ज्योज्यो आले नाना आडागदे, एनीगदे चा ज्यबा लबारी खाइमै दुख थाम्हन्गो।

१४डन्से भिबा चु चिठीला ताम चुदे खालैसे आङ्यान्नी भिसम थे म्हिदा डोसेसी थान्गो, ओच्छे थेहङ्बा म्हिला संगतनोन थालउ। थेहङ् लसम थे हाङनोन पेःला। १५तसैनोन थेदा शत्रु हङ्बा थाम्हन्गो, तर ज्योज्यो आलेदा हङ् लसी थेदा अर्ती पिन्गो।

चिठीला थुमरी भिबा ताम

१६यहाङदा शान्ति पिन्बा प्रभुसे एनीगदेदा जस्तोन तसै सदन शान्ति पिन्नै। ओच्छे प्रभु सदन एनीगदेदेन छ्याम तगै।

१७डा पावल हाङलान यासे फ्याफुल्ला भिसी भिबा मुला। ओच्छे डाला जम्मान चिठी डोसेबाला लागिरी सदन डाइ चुहङ् लसी भिबा मुला।

१८यहाङला प्रभु येशू ख्रीष्टला दयामाया एनीगदे जम्मानदेन छ्याम तगै।